

plices ordinaires, & comme les traistres sont punis. 31. Cour de Westmontier, & la Chambre Esfoillée, quand establis. 32. Cour d'Eglise appelée Cour de la Chrestienté, & sa Iurisdiction en quatre sortes de causes. 33. Criminels condamnés à estre pendus, sont estranglez par la main de leurs propres parens. 34. Religion Chrestienne quand & par qui premierement induite en Angleterre. 35. Divorce du Roy Henry VIII. d'avec Catherine d'Arragon, & lequel esponse Anne de Boulen, qu'on croyoit estre sa fille. 36. Se declare chef de l'Eglise Anglicane au lieu du Pape, & fait emprisonner Thomas Morus. 37. Monasteres & Religion Romaine quand abolis en Angleterre. 38. Couronnement de la Roynne Elizabeth, celebré avec les ceremonies Catholiques. 39. Constitutions Ecclesiastiques dressées par le Roy Iacques VI. monstrant l'Estat moderne de l'Eglise Anglicane. 40. Catalogue des Roys d'Angleterre. 41. Archeschez & Eueschez qui estoient anciennement en Angleterre.

- I. Je pourrois paroistre vain, ou bien me rendre ennuyeux, si ie voulois rapporter icy le long debat des noms anciens de cette Isle, puis qu'il semble qu'on doit plutôt attendre de mon dessein la consideration des choses que des paroles. Toutesfois l'importune curiosité de ceux qui les pourroient demander à cette entrée, me conuiera seulement à dire, que selon les fabuleux recits des Grecs, elle porta premierement le nom de certain Albion fils imaginé de Neptune; ou bien selon les Latins, elle fut ainsi nommée pour les rochers blanchissant qu'on y apperceuoit autour du riuage, elle receut apres le nom de Bretagne, de ce mot *Brit*, signifiant coloré en Anglois, pource que les habitans de cette Isle auoient accoustumé de peindre leurs corps, & depuis elle changea ce nom en celuy d'Enghelland, c'est à dire, terre des Anglois, à cause des Anglois Saxons qui la possederent. Cecy doit suffire à ceux qui veulent contenter vn peu leur esprit, ou complaire à la paresse qui les tient d'en faire ailleurs la rechercher. Or afin de venir au point, l'Isle de la grâde Bretagne est presque semblable à la Sicile, ayant trois pointes ou Caps, qui s'estendent en diuerses sortes. Le premier qui regarde le Couchant est celuy de Bellerie, ou d'Antoüest, nommé des Anglois *The Cape of Cornwall*, c'est à dire, Cap de Cornouaille. Le second est celuy de Cantie, qui a son regard du costé du Leuant, aujourd'huy nommé *Norforland*, de qui toute la contrée de cette Isle, qui s'estend vers l'Orient, a pris le nom de Cant, ou de Kent, selon le vulgaire. Le troisieme est celuy d'Orcas, de Taruedée, ou de Taruise du costé du Nord, nommé par les vns *Dunghunbeheat*, ou *Dunbeihede*, & par quelques autres *Hounburne*. Cette Isle est assise vers la partie Occidentale à l'Europe, à cinquante & vn degré de l'Equateur, & est opposée du Couchant à l'Isle d'Irlande, du Leuant aux riuages de la basse Allemagne, du costé du Nord aux Isles Orkades, ou Orknes, & du Midy à la France. Quant à son estenduë les Anglois qui l'ont plus curieusement considerée, la mesurent en cette sorte. Ils comptent du Cap de Taruise jusques à celuy de Bellerie, pource que le chemin va serpentant à cause des riuages courbez, à le prendre du Couchant 812. milles. De ce lieu jusques à Kent 320. milles. De là par des destours & recoings on compte jusques à Taruis 704. milles. Tellement que le tour de toute l'Isle contient enuiron 1835. milles. Mais pource que c'est peu de connoistre l'estenduë de quelque pays, si l'on ne scait sa bonté, ie desire auant que de m'engager en d'autres discours, considerer ce que cette Isle fournit à ses habitans, & par mesme moyen ce dont elle manque.